



partii naleraq

UPA 2016/111-01

19.04.2016

Qitiusumik Dna-mut nalunaarsuiffik pillugu inatsisip atuutsinneqalernissaannut peqqussutissatut siunnersuutip aamma Qitiusumik Dna-mut Nalunaarsuiffik pillugu inatsimmi § 1-imi inatsimmut allannguutip, eqqartuussisaaseq pillugu inatsisip aamma qamutininik assakaasulinnik nalunaarsuisarneq pillugu inatsisip (dna, assaat ipaasa naqinneri aamma qamutit assakaasullit naalagaaffiit Europami Suleqatigiiffiup Avataaniittut pillugit paasissutissanik avitseqatigiittarneq) Kalaallit Nunaannut atuuttussanngortinneqarnissaannut peqqussutissatut siunnersuut.

Qitiusumik Dna-mut nalunaarsuiffik pillugu inatsisip atuutsinneqalernissaannut peqqussutissatut siunnersuutip aamma Qitiusumik Dna-mut Nalunaarsuiffik pillugu inatsimmi § 1-imi inatsimmut allannguutip, eqqartuussisarneq pillugu inatsisip aamma qamutininik assakaasulinnik nalunaarsuisarneq pillugu inatsisip (dna, assaat ipaasa naqinneri aamma qamutit assakaasullit naalagaaffiit Europami Suleqatigiiffiup Avataaniittut pillugit paasissutissanik avitseqatigiittarneq) Kalaallit Nunaannut atuuttussanngortinneqarnissaannut peqqussutissatut siunnersuut Partii Naleqqamiit imannak oqaaseqarfigissuarput.

Aalajangiiffigisassatut siunnersuummi qitiusumik dna-mut nalunaarsuiffimmik, politiit pinerluutininik, soorlu toqutsinernik, kinguaassiutitigut pinngitsaaliinernik meeqqanullu kannguttaatsuliornernik, misilittakkat malillugit pinerluuteqartup amerlanertigut timimik sananeqaataasa ilaannik qimatsiffigisartagaannik misissuinissamut periarfissaasa pitsaanerulernissaat siunertarineqarpoq.

Dna-mik nalunaarsuiffiup politiit nalunaarsugaannut pioreersunut, soorlu qitiusumik pinerluttulerinermi nalunaarsuiffimmut aamma Naalagaaffiup Politiivisa assaat ipaasa naqinnerinik nalunaarsuiffiannut, ataatsimut isigalugit pinerlunnissamut pinaveersaartitsinermi paasiniaanermilu iluaqutissatut siunertaqarfiusunut tapertaasarnissaa siunertarineqarpoq.

Dna-mut nalunaarsuiffiup politiit pinerluutininik paasisaqarnissamut periarfissaannik pitsannguinnissamut tunngavissat pingasuusut saqqummiussinermi uku oqaatigineqarput:

1. Politiit timip sananeqaataasa ilaat suminngaanneerfissineqanngitsut, pinerluffiusumi nassaarineqartut dna-mut tunngasortaannik, dna-nut inuttarsineqarsimasunut nalunaarsuiffimmeereersunut assersuussinissamut periarfissaat pitsaanerulissasut,
2. Pinerluuteqartoq inuup pisataanik qimatsisimatillugu politiit pinerluttoqarsimatillugu pasilliinermi inunnik pisuunngitsunik pilertornerusumik iperaanissamut periarfissaqalissapput.
3. Dna-mut nalunaarsuiffik inuup ataatsip pinerlunnerni marlunni amerlanerusuniluunniit peqataasimanissaa ilimagineqartillugu, politiit aalajangiisinaanissaannut periarfissiissasoq. Inuk pineqartoq kinaassusersineqanngikkaluarpalluunniit, taamatut ilisimasaqarnermi inuup, soorlu arlaleriarluni kinguaassiutitigut pinngitsaaliisimasinnaanerata paasineqarsinnaaneranut politiit misissuinerisa ingerlaqqinneranni aqqissuussinermut pingaaruteqarsinnaasoq.

Aamma isumaqarpugut politiit sulinerminni periarfissaat pitsaaneruliinnaratik, kisianni aamma suliassanik eqqartuussivitsigut aaliangiisarnissanut tunngavissaat qularnaannerulerlutillu pitsaanerulissasut.

Nalunngilarput naalagaaffiup politeeqarneq suli akisussaaffingaa, taamaakkaluartoq siunissamut piareersimanissaq eqqarsaatigalugu, naggataatigut Naalakkersuisunut apeqqutigissuarput, uuma suliap inatsisartunut saqqummiunneqannginnerani Naalakkersuisut misissuisimanersut:

- a. Dna-mut nalunaarsuiffimmik nunatsinni pilersitsisoqarsinnaaneranut periarfissat qanoq ittuuneri pillugit ?
- b. aamma taamaaliortoqassangaluarput tamanna qanoq akeqarsinnaanersoq ?

tassami suut tamaasa siunissami danmark-imut isumagisassanngortittuaannarsinnaanngilagut, namminermi naalagaaffinngornissarput pillugu sulivugut, soorlu qinersisartut 2008-imi Namminersorneq pillugu taasinerikkut tamanna ersarissumik piumasaringaat !

Taama oqaaseqarluta siunnersuut taperserparput, apeqqutittalu akineqarnissaat qilanaaralugu.